

Dr. Livio Hermans a deleita e publico durante ceremonia di reapertura di Biblioteca Nacional



Dr. Livio Hermans.

ORANJESTAD – Diadomingo anochi durante di e ceremonia di reapertura oficial di e edificio central situa den George Madurostraat, e pianista Livio Hermans a sa di deleita e publico presente cu su repertorio extenso.

Entre nan el'a toca e dushi himno di Aruba y e wals di Padu del Caribe, titula 'Biblioteca Nacional'. E composicion aki ta riba un CD di Padu di aña 1994 y for di e tempo ey biblioteca ta consider'e su

himno.

Dr. Livio Hermans, un gran amigo di biblioteca, ta medico y apotheker, cu un pasion grandi y talento pa piano.

Cu 7 aña Livio a haya su prome les di piano cerca Miss Lilian van Dijck. Despues el a sigui cu les cerca maestro Edgar Palm, teoria di musica y en particular ehecucion di musica Antiano. Durante su estudio na Amsterdam el a tuma les di interpretacion di musica clasico di siglo 18 y 19.

Durante añanan Livio a duna diferente presentacion riba piano, tanto como solista como acompaña na piano di p.e. 'Orfeon Crescendo' di Frank Davelaar na Corsou. Sinembargo su preferencia semper a bay pa acompaña na piano "das Lied". Na 1995 Livio a saca un CD di composicionnan di Edgar Palm q.e.p.d. como homenahe na e gran maestro aki.

Como un lesado y estudiante pa bida, Livio ta un bishitante fiel di biblioteca. □